

Lima komponen utama program SK2 UMNO

SEREMBAN 4 Feb. - Majlis Tertinggi UMNO melalui Biro Pembangunan Sosial parti itu memperkenalkan program 'Satu Keluarga Satu Kaunselor' (SK2 UMNO) yang dirasmikan oleh Presiden parti, Datuk Seri Abdullah Ahmad Badawi di sini, hari ini.

Program yang mempunyai lima komponen penting itu antara lain bermatlamat meningkatkan jati diri anak-anak ahli UMNO, mengukuhkan hubungan ibu bapa ahli UMNO dan memasyarakatkan kemahiran kaunseling di kalangan pemimpin parti itu.

Lima komponen penting di bawah program tersebut adalah:

● Latihan skil kaunseling untuk pemimpin UMNO bahagian

Komponen ini bertujuan memberi pendidikan kaunseling kepada pemimpin UMNO bahagian serta tips mengenai kaedah menangani masalah sosial seperti ponteng sekolah, menghisap dadah, seks bebas, lumba haram, lepak, gengsterisme dan

mencuri di kalangan orang Melayu.

Program yang melibatkan sesi latihan skil kaunseling ini dilengkapi dengan modul oleh pakar kaunseling negara dan diiktiraf oleh Kementerian Pembangunan Wanita, Keluarga dan Masyarakat.

Untuk peringkat permulaan, seramai empat peserta mewakili setiap negeri akan menyertai program ini membabitkan modul seperti pengenalan kepada kaunseling, psikologi manusia dan kaedah menolong serta kemahiran menolong melalui kaunseling, ciri-ciri pembantu yang berkesan, proses komunikasi, proses kaunseling, teknik menolong yang berkesan dan etika kaunseling.

● Pameran gejala sosial

Dalam usaha memberikan kesedaran tentang bahaya masalah sosial di kalangan orang Melayu, satu pameran dianjurkan melibatkan pelbagai agensi yang terlibat dalam menangani isu gejala sosial.

Antaranya, Kementerian Belia dan Su-

kan, Kementerian Pelajaran, Kementerian Pengajian Tinggi, Kementerian Sumber Manusia, Kementerian Pembangunan Wanita, Keluarga dan Masyarakat, Lembaga Penduduk dan Pembangunan Keluarga Negara, Jabatan Pembangunan Wanita, Jabatan Kebajikan Masyarakat, pihak berkuasa tempatan (PBT), media massa dan badan bukan kerajaan (NGO).

● Kempen pendaftaran sukarelawan kaunselor dan kaunselor bertauliah

Terdapat sebilangan kaunselor yang berkelayakan di Malaysia masih belum mendaftar sebagai kaunselor dengan Lembaga Kaunseling Malaysia.

Oleh itu, program ini akan mengadakan kempen pendaftaran besar-besaran bagi menarik minat kaunselor berkelayakan sekali gus menjemput mereka tampil ke hadapan sebagai sukarelawan untuk membantu ibu bapa yang bermasalah di setiap bahagian UMNO.

Cara untuk mendaftar kaunselor melalui SMS adalah taip sksk, daftar, nama anda, nombor kad pengenalan, negeri dan hantar ke 32728/dapat.

● Pendidikan melalui media

Untuk memberi lebih kesedaran mengenai masalah sosial ini, sebuah drama kisah benar bersiri berjudul 'Satu Keluarga Satu Kaunselor' akan siarkan melalui televisyen RTM.

Tujuannya adalah untuk memberi pendidikan kaunseling kepada setiap isi rumah supaya akan wujud sekurang-kurangnya seorang yang boleh bertindak sebagai kaunselor dalam sebuah rumah serta berkeupayaan menangani masalah sosial.

● Program bual bicara gejala sosial

Satu program bual bicara melibatkan dialog yang bersifat perbincangan intelektual antara artis tempatan dan kaunselor bertauliah turut diadakan. Dialog ini bersifat interaktif dan pendidikan.